

Headline Nanas Dinar
Date 10. Jul 2008
Media Title Berita Harian
Section Hip
Circulation 217920
Readership 2083000

Language MALAY
Page No 22
Article Size 859 cm²
Frequency Daily
Color Full Color



Nanas Dinar

Klon bermutu tinggi lebih kaya vitamin C

Oleh Mona Ahmad
bhnews@bharian.com.my

MENYEDARI masalah kekurangan anak benih di pasaran bagi membolehkan bidang pertanian terus berkembang, syarikat Asma Agro (M) Sdn Bhd (Asma Agro) menjadi peneraju dalam bidang pembenihan pokok nanas jenis MD2 yang dikenali sebagai Nanas Dinar.

Berpangkalan di Johor Bahru, Johor, syarikat milik Bumiputera sepenuhnya itu turut mempunyai nurseri bagi benih semaiannya nanas dalam beg poli di kawasan Gunung Panti, Kota Tinggi, Johor.

Ketua Pegawai Eksekutif Asma Agro, Mohd Sabri Jabir, berkata pihaknya mengeluarkan dan membekalkan benih bermutu tinggi daripada klon yang terpilih menerusi teknologi pembibitan tisu.

"Kami turut mempunyai keupayaan dan kapasiti untuk membuat pembibitan anak pokok yang berasal

dari germplasm (mother cell) dalam makmal. Seterusnya, benih dianjurkan ke nurseri dan disemai dalam beg poli sebelum dipasarkan untuk ditanam di ladang.

"Misi kami untuk membangun, mengembangkan dan mempromosikan rantaian nilai, menerapkan kegiatan pertanian yang berkualiti dalam pertanian komersial berskala besar dengan penggunaan kaedah kulturtisu," katanya kepada *Berita Harian*, baru-baru ini.

Mohd Sabri berkata ketika ini kawasan tanaman nanas di negara ini seluas kira-kira 45,000 hektar yang kebanyakannya di Johor dan Terengganu.

Mengikut kajian, katanya, Nanas Dinar boleh dibibangkan dalam makmal yang seterusnya menghasilkan jutaan benih nanas.

Bagaimanapun, beliau berkata, bekalan benih nanas untuk permintaan tempatan masih tidak mencukupi untuk menampung keperluan pertanian di kawasan itu.

Justeru, Mohd Sabri berkata pihaknya mem-



PEMBEKAL: Mohd Sabri bersama benih Nanas Dinar yang dibiakkan dalam makmal.

fokuskan pengeluaran nanas jenis MD2 dan pisang Dwarf Cavendish.

Lazimnya, nanas jenis lain yang terdapat di Malaysia seperti Sarawak Smooth Cayenne, Josapine, N36, Moris, dan Gandol ditanam menerusi kaedah konvensional menggunakan anak tanah dan jambul nanas.

Bagaimanapun, katanya, Nanas Dinar boleh dibibangkan dalam makmal yang seterusnya menghasilkan jutaan benih nanas.

Beliau berkata Nanas Dinar keluaran syarikat itu adalah nanas hibrid yang menepati piawaian antarabangsa kerana warna, rasa, bentuk, jangka hayat dan tahap keranumannya lebih baik daripada jenis

yang lain.

Keistimewaan Nanas Dinar ialah 30,000 pokok boleh ditanam di tanah seluas 0.4 hektar berbanding 15,000 saji pokok nanas biasa bagi keluasan yang sama.

Ini kerana, Nanas Dinar mempunyai daun tanpa tulang dan lebih hijau dari pada daun nanas biasa serta boleh ditanam dalam keadaan rapat-rapat di antara satu sama lain.

Malah, Mohd Sabri berkata, tempoh tuaianya juga singkat iaitu setahun berbanding nanas biasa antara 15 hingga 20 bulan.

Nanas Dinar turut mempunyai kandungan gula yang tinggi dan bertukar warna kekuningan apabila masak.

Ia sentiasa mengeluarkan hasil yang setara dari segi saiz dan berat iaitu antara

1.3 hingga 1.5 kilogram.

Isinya lebih manis, kompleks, kurang fiber dan mengandungi lebih empat kali ganda vitamin C daripada nanas jenis biasa.

Jangka hayatnya juga lama

iaitu 30 hari selepas dituai berbanding jenis lain yang hanya tahan sehingga 21 hari saj� dan mampu bertahan di dalam tempat penyekujur sehingga dua minggu.

"Selain itu, keistimewaan Nanas Dinar, mata nanas tidak banyak dan empulur-nya lembut apabila masak," katanya.

Mohd Sabri berkata, pihaknya turut mempunyai makmal dan inkubator di Universiti Teknologi Malaysia – Malaysian Technology Development Corporation (MTDC), Taman Teknologi, Johor Bahru.

Katanya, menerusi makmal sendiri, pihaknya mampu mengeluarkan anak benih Nanas Dinar sehingga 10 juta anak benih setiap tahun.

Memperoleh teknologi daripada syarikat bioteknologi luar negara, Asma Agro turut menggunakan kepakaran ahli sains dari UTM dan Universiti Putra Malaysia (UPM).

Dengan tenaga kepakaran dalam bidang bioteknologi serta pertanian selain menjadi pengeluar dan pembekal tanaman kultur tisu yang bermutu tinggi, Asma Agro turut menawarkan khidmat perundingan bagi industri bioteknologi.

Mohd Sabri berkata, menyedari permintaan tinggi termasuk dari luar negara terutama negara Timur Tengah, pihaknya turut menjalankan penyelidikan pemasaran.

Katanya, menerusi penyelidikan itu, kaedah pengkulturan tisu mampu meningkatkan penghasilan benih untuk tujuan pertanian yang sekali gus bertindak mengukuhkan sektor pertanian negara.



LUAS: Tapak semaiannya Nanas Dinar milik Asma Agro di Gunung Panti, Kota Tinggi.



TEKNOLOGI: Makmal pengkulturan tisu bagi menghasilkan benih Nanas Dinar di UTM-MTDC.